

ՇԻՐՎԱՆՁԱՂԵԻ «ԵՎԳԻՆԵ» ԴՐԱՄԱՆ ՄՈՆՐԵԱԼԱԶԱՅ ԲԵՄՈՒՄ

ԱՆԱՀԻՏ ԲԵՔԱՐՑԱՆ

*...Շիրվանզաղեն, որքան և թե-
րություններ ունենա, դարձյալ կմնա այն
հեղինակը, որ տանում է մեր գրակա-
նությունը դեպի Եվրոպա:*

Վ. Տեղյան¹

Ալեքսանդր Շիրվանզաղեն «Եվգինե» երեք գործողությամբ դրաման, որը գրել է 1901 թ. հուլիս-օգոստոս ամիսներին, նվիրաբերել է իր մորաքրոջ որդուն՝ հայ անվանի դերասան, Շիրվանզաղեի ստեղծած կերպարների անգուգական մարմնավորող Հովհաննես Աբեյյանին: «Եվգինե» առաջին անգամ ներկայացվել է նույն թվականի հոկտեմբերի 29-ին Թիֆլիսի Արտիստական ընկերության նորաբաց թատրոնի² լեկ-լեցուն դահլիճում՝ Գևորգ Պետրոսյանի բեմադրությամբ: Ներկայացմանը մասնակցել են այն ժամանակվա հայ դերասանական առաջնակարգ ուժերը՝ Հովհաննես Աբեյյան (Միհրան Ալվերդյան), Օլգա Մայսուրյան (Եվգինե Ալվերդյան), Մարի Չաբել (Հռիփսիմե Միրվելյան և Սարթա Տերտերյան), Մատթեոս Աղայան (Համազասպ Վարսամյան), Հովհաննես Օնիկ) Ստեփանյան (Աբգար Սուլթանյան), Գևորգ Պետրոսյան (Գաբրիել Ազարյան), Մարիամ Ավետյան (Զարուհի Գալամբարյան), Գրիգոր Ավետյան (Բարսեղ Գալամբարյան), Օլգա Գուլազյան (Երմոնե): Ներկայացումը, որին ներկա է եղել հեղինակը, ունեցել է մեծ հաջողություն: Թատերախոս Գ. Վանցյանի վկայությամբ՝ հանդիսատեսն այն ընդունել է ջերմորեն և ըստ արժանվույն՝ «տեսնելով մեր առաջին վիպասանին մեջ եւ առաջնակարգ թատերգակի շնորհք», թատրոնից հեռանալով «այն հաճելի գիտակցութեամբ, որ Սոււնդուկեանի տեղը թափուր չի մնալու այսուհետեւ»³: Դրվատական հոդված-

¹ Վահան Տեղյան, Հայ գրականության գալիք օրը, Երկերի ժողովածու երեք հատորով, հատոր երկրորդ, Եր., 1961, էջ 272:

² Թիֆլիսի Արտիստական ընկերության թատրոնի հանդիսավոր բացումը կայացել է 1901 թ. փետրվարի 8-ին: Այդ թատրոնի թատերական բացառիկ կառուցվածք ներկայացնող փառահեղ շենքը (այժմ՝ Վրաստանի Ռուսթավելու անվան թատրոնի շենք) Թիֆլիսի կենտրոնում Գոլովինսկի պողոտայում, իր միջոցներով կառուցել է արվեստի երկրպագու, հայ մեծահարուստ Եսայի (Իսայի) Փիթոնը (1844-1904):

³ Գրիգոր Վանցյան, Եւգինե. թատերգութիւն երեք գործողութեամբ Շիրվանզաղեի, «Անահիտ», Դ տարի, մարտ 1902, թիւ 3, էջ 64 (նույն խոսքերը բերված են նաև ամսագրի հաջորդ համարում տպագրված հոդվածի շարունակության վերջում՝ թիւ 4, էջ 89):

ներ են տպագրվել ինչպես հայկական⁴, այնպես էլ Կովկասի ռուսական մամուլում: Եղել են նաև քննադատական հոդվածներ, որոնց մեջ չնայած խիստ զգացվում է կողմնակալությունը, բայց միաժամանակ, առանձին դեպքերում, նույնպես նշվում են դրամայի արժանիքները⁵: Հետագայում Շիրվանզադեին՝ որպես դրամատուրգի, ավելի բարձր գնահատական է տվել հայ մեծատաղանդ բանաստեղծ Վահան Տերյանը: 1914 թ. ապրիլի 30-ին Թիֆլիսի Երաժշտական ընկերության դահլիճում «Հայ գրականության գալիք օրը» թեմայով իր հրապարակային դասախոսության ժամանակ Տերյանն ընդգծում է. «Դրամայի մեջ որքան էլ ինքնատիպ, խոշոր և հետաքրքրական լինի Սունդուկյանը – նա առանձին երևույթ է, նա դարձյալ ունիկում է իր «Պեպո»-ով, իսկ ուղի հարթողը Շիրվանզադեն է: Չպետք է մոռանալ, որ կենցաղագրական և հոգեբանական դրամային **գրական** լեզվով ամենից շատ զարկ է տվել Շիրվանզադեն, և որքան էլ թերություններ ունենան նրա գրվածները, նրա նշանակությունն այդ ասպարեզում շատ է մեծ ու նշանակալից»⁶:

«Եվգինե» դրաման առաջին անգամ տպագրվել է «Թատրոն» հանդեսում 1903 թ.⁷: Նույն թվականին այն լույս է տեսել առանձին գրքով⁸, ինչպես նաև զետեղվել է Շիրվանզադեի «Երկերի ժողովածուի» չորսհատորյակի երկրորդ հատորում⁹: Հետագայում «Եվգինե» դրաման տարբեր արհեստավարժ թատերախմբեր և թատերասերներ բազմիցս բեմադրել են թե՛ Անդրկովկասում, թե՛ Ռուսաստանում, թե՛ այլ երկրների հայաշատ վայրերում. առանձնապես 20-րդ դարի առաջին տասնամյակում¹⁰:

Ուշագրավ է, որ Շիրվանզադեի «Եվգինե» դրաման թարգմանվել է նաև վրացերեն (թարգմանիչ՝ Ղազար Կարապետյան) և 1910 թ. լույս տեսել Թիֆլիսում՝ «Մախալիո գազետի» լրագրի հավելվածի 9-14 համարներում: Այդ դրաման վրացերեն բեմադրվել է Վրաստանի մի շարք քաղաքներում:

⁴ Տե՛ս, օրինակ, Ռ., Հայոց թատրոն, «Նոր-դար», 1 նոյեմբերի 1901, № 161, էջ 2: «Հայոց թատրոն», «Լուսալ», 1902, № 1, էջ 248-255: Գ. Վանցյանի նշված հոդվածը՝ «Անահիտ», 1902, թիւ 3, էջ 60-64, թիւ 4, էջ 87-89 և այլն:

⁵ Տե՛ս, օրինակ, Վ. Նալբանդեան, Մի նոր պիես. «Եւգինե», դրամա երեք գործ. հեղ. Շիրվանզադեի, «Մշակ», 1 նոյեմբերի 1901, № 243, էջ 1-2:

⁶ Վ. Տերյան, նշվ. աշխ., էջ 271:

⁷ Տե՛ս **Շիրվանզադե**, Եւգինե, դրամա երեք գործողութեամբ, «Թատրոն», Գրական եւ թատերական հանդես (հինգերորդ տարի), № 1, գիրք Թ, Թիֆլիս, 1903, էջ 20-57:

⁸ Տե՛ս **Շիրվանզադե**, Եւգինե, դրամա 3 գործողութեամբ, Տպ. «Վերեիչեւ եւ Կամեն-մախեր», Թիֆլիս, 1903:

⁹ Տե՛ս **Շիրվանզադե**, Երկերի ժողովածու, հատոր երկրորդ, Տպ. «Վերեիչեւ եւ Կամեն-մախեր», Թիֆլիս, 1903, էջ 291-366: Հայ անվանի գրաքննադատ Հրանտ Թամրազյանը **Շիրվանզադեի** «Երկերի ժողովածուի» (տասը հատորով) վեցերորդ հատորում (1959, էջ 533) «Եվգինե» դրամայի վերաբերյալ տված ծանոթագրություններում թյուրիմացաբար նշում է, որ «Եվգինեն» զետեղվել է 1903 թ. հրատարակված չորսհատորյակի չորրորդ հատորում:

¹⁰ Ավելի մանրամասն տե՛ս **Բաբկեն Հարությունյան**, XIX-XX դարերի հայ թատրոնի տարեգրություն (1801-1922), հատոր երկրորդ (1901-1911), Հայկական ՍՍՀ ԳԱ հրատարակչություն, Եր., 1980:

20-րդ դարի երկրորդ տասնամյակում և հետագայում «Եվգինե» դրաման շատ ավելի քիչ է բեմադրվել իր տեղը զիջելով Շիրվանզադեի մյուս դրամաներին: Թե՛ Հայաստանի, թե՛ արտերկրի հայկական թատրոնների խաղացանկերում այն գրեթե չի հիշատակվում: Եղել են հազվադեպ, հատուկ ենտ ներկայացումներ:

Եվ վերջապես, հեռավոր Կանադայում 1974 թ. նոյեմբերի 10-ին Մոնրեալի Հայաստանյայց առաքելական սուրբ եկեղեցու «Մամիկոնյան» մշակութային միության թատերախումբը տեղի Ութրըմոն ավագ դպրոցի շքեղ թատերասրահում ներկայացրել է «Եվգինե» թատերգությունը՝ բեմադրիչ և դերուսույց Ս. Քեքիկյանի¹¹ ղեկավարությամբ:

Այստեղ նպատակահարմար ենք գտնում անդրադառնալ այն փաստին, որ «Մամիկոնյան» թատերախումբը գործում է 1962 թվականից: Ինչպես նշում է այդ եկեղեցու «Բուրաստան» պաշտոնաթերթը¹², 1962-ի փետրվարի 21-ին և 22-ին Մոնրեալի հայ համայնքի մի քանի խանդավառ անդամներ, հիմնականում պոլսահայեր, ցանկանալով օտար ափերում վառ պահել հայ մշակույթը, ձեռնամուխ են եղել «Վարդանանք» ողբերգության բեմադրությանը¹³: Ներկայացումը հանդիսականներն ընդունել են ջերմությամբ, իսկ դերակատարները՝ ոգևորված հաջողությունից, որոշում են ստեղծել մի թատերախումբ և իրենց առաջին ներկայացման պատվին այն անվանել «Մամիկոնյան»: 1964-ի դեկտեմբերին «Մամիկոնյան» թատերախումբը համալրվում է նոր ուժերով, ընդլայնում իր գործունեության շրջանակը և վերակազմավորվում է որպես «Մամիկոնյան» մշակութային միություն: Սակայն, անհասկանալի պատճառներով, որոշ աղբյուրներում որպես «Մամիկոնյան» մշակութային միության գործունեության սկիզբ հիշատակվում է 1959 թվականը¹⁴: Մինչդեռ, մեր կարծիքով, դա 1962 թվականն է, երբ, ինչպես արդեն նշել ենք, «քանի մը խանդավառ անձեր, թատերական արուեստի հրապոյրէն մղուած», «21 եւ 22 Փետրուար թւականներուն»

¹¹ **Սելմա Քեքիկյան**, (1927-2004), սփյուռքահայ օպերային երգչուհի, դերասանուհի, ազգային գործիչ: Ավարտել է Կահիրեի կոնսերվատորիան: Եղել է Կահիրեի պետական օպերային թատրոնի երգչախմբի անդամ, դերեր է ստանձնել հյուրախաղերի եկած Միլանի «Լա Սկալա» և Բելգրադի օպերային թատրոնների մենակատարների հետ: 1982 թ. տեղափոխվել է Մոնրեալ, հանդես եկել մենահամերգներով, ելույթ ունեցել կանադական հեռուստատեսությամբ, երգել Մոնրեալի օպերային թատրոնում («Քույր Անջելիկա», «Ֆաուստ», «Ռիգոլետտո», «Ռոմեո և Ջուլիետ», «Դոն Կարլոս», «Մակբեթ», «Մամսոն և Դալիլա» և այլ օպերաներում): 1976 թ. հիմնել է Մոնրեալի «Արմենյան» թատերախումբը: 1987 թ. ծննդյան 60-ամյակի առթիվ պարգևատրվել է Կանադայի կառավարության պատվոգրով, որը հանձնել է անձամբ Կանադայի վարչապետը:

¹² Եկեղեցական, գրական և մշակութային ամսաթերթ (հետագայում՝ կրոնաբարոյական, մշակութային երկամսաթերթ), որը լույս է տեսնում 1963 թ.: Ցավոք, այնպիսի հեղինակավոր հանրագիտարանում, ինչպիսին է «Հայ Սփյուռք հանրագիտարանը», (Եր., 2003) (տե՛ս էջ 335 և 341), տեղ է գտել անճշտություն «Բուրաստան» երկամյա (չնայած այն սկզբում եղել է մեկամյա) հանդեսի լույսընծայման սկիզբ համարվել է 1964 թվականը:

¹³ Տե՛ս «Մամիկոնեան մշակութային միութիւն», «Բուրաստան», Գ տարի, թիւ 23-24-25, մայիս-յունիս-յուլիս, 1965, էջ 15:

¹⁴ Տե՛ս, օրինակ, «Հայ Սփյուռք հանրագիտարան», էջ 338:

ներկայացրել են երկու արար «Վարդանանք» ողբերգությունից¹⁵: Հետևաբար, մեր կարծիքով, միանգամայն անհասկանալի ու անընդունելի է «Մամիկոնյան» մշակութային միության գործունեության սկիզբ համարել 1959 թվականը: Լավագույն դեպքում «Մամիկոնյան» մշակութային միության գործունեության սկիզբ կարելի է ընդունել 1962 թվականը («Մամիկոնյան» թատերախմբի գործունեության սկիզբը), իսկ ավելի ճշգրիտ՝ 1964 թվականը:

Այժմ վերադառնանք «Եվգինե» ներկայացմանը: Այն ունեցել է բավականին մեծ հաջողություն և ջերմորեն է ընդունվել հանդիսականների կողմից: Ինչպես նշում է «Մամիկոնյան» մշակութային միության ավագ անդամ, բազմավաստակ դերասան Խ. Տետեյանը¹⁶ (ով, «իբրև վերջերան բեմասեր», նույնպես մասնակցել է ներկայացմանը՝ «փոքր դերով մը, մտածելով որ փոքր դեր չկայ, այլ կայ փոքր դերասան»¹⁷), «Դասական բնոյթ կրող թատերախաղ մըն է «Եվգինե» թատերախաղը գոր այնքան յաջող կերպով բեմադրուեցաւ: Չմայլելի եւ ճոխ բեմայարդարում: Չգետտաւորում: Խաղարկութիւն: Ահա երրորդութիւն մը, հրամցուած լուրջ հանդիսասարահի մը մէջ»¹⁸: Մամուլից քաղված տեղեկությունները վկայում են, որ երկար ամիսների ընթացքում կատարված թատերական փորձերը տվել են ցանկալի արդյունք. բոլոր դերակատարներն էլ հաջողությամբ են մարմնավորել իրենց ստանձնած կերպարները, քանի որ «արուեստը այնպիսի մոգական ոյժ մը ունի իր մէջ որ կ'ազնուացնէ ամէն անոնց, որոնք կը հային այդ արուեստին: Եւ դերակատարները, ոչ միայն հպած էին արուեստին, այլ եւ ամուր կառչած էին անոր»¹⁹:

Եվգինե Ալվերդյանի դերում հանդես է եկել Անահիտ Շիշմանյանը, ով «կը գերեվարէ հանդիսականը իր քնքոյշ ձայնով, զուսպ եւ ազնուական խաղարկութեամբ մը: Անոր մէջ կան չափ, կշիռ եւ մտածում: Յաճախ արցունքի հովիտ մըն է ան»²⁰, իսկ Եվգինեի ամուսնու՝ փաստաբան Միհրան Ալվերդյանի դերը կատարել է Նուպար Արսեն Մամուրյանը: Ամուսինների դերակատարների համահունչ խաղը մեծ տպավորություն է թողել հանդիսականների վրա և արժանացել բարձր գնահա-

¹⁵ «Մամիկոնեան մշակութային միութիւն»... էջ 15:

¹⁶ **Խորեն Տետեյան**, (1901-1980), սփյուռքահայ դերասան, Չմայլունիայի «Արտավազ» թատերախմբի հիմնադիրներից (1919), եղել է Վ. Փափագյանի և Հ. Աբելյանի խաղընկերը: 1922 թ. տեղափոխվել է Սալոնիկ, որտեղ հիմնադրել է հայկական թատերախումբ Հ. Չարիֆյանի մասնակցությամբ: 1930-1963 թվականներին բեմական գործունեություն է ծավալել Կահիրեում, իսկ այնուհետև Կանադայում: Հրատարակել է «Ժպիտ» (1947) խորագրով երգիծական պատմվածքների ժողովածուն և «Երիտասարդի մը հուշատետրը...» (1949) վիպակը, գրել է «Թատերական ակնարկներ» (1963), «Կենսագրական գիծեր» գործերը և մոտ մեկ տասնյակ թատերգություններ:

¹⁷ **Խորեն Տետեյան**, Շիրվանգատի «Եվգինե» թատերախաղը Մոնթրեալի բեմին վրայ, «Բուրաստան», Ժ տարի, թիւ 132, դեկտեմբեր, 1974, էջ 6: Ի դեպ, Խ. Տետեյանը նույն վերնագրով, բայց փոքր-ինչ այլ բովանդակությամբ, «Թատերական» խորագրի տակ հոդված է տպագրել նաև «Քուլիսում» (տե՛ս ծանոթագրություն 22):

¹⁸ Նույն տեղում, էջ 4:

¹⁹ Նույն տեղում:

²⁰ Նույն տեղում:

տականի՝ կարծես թե խաղացել են ոչ թե սիրող, այլ արհեստավարժ դերասաններ: Իրոք, «բեմի երկու հսկաներ, ոչ սիրողներ կարծեք, այլ փրփեւիտներ, բեմին վրայ, իրարու մրցակից, իրար գերազանցելու խանդավառութիւնով եւ սակայն իրարմով միայն յաղթական», ընդ որում՝ «կրնայ պատահիլ որ այդ գոյգին առնչութեամբ գնահատանք մը գրուած, կրնար բան մը պակսեցնել այդ հիասքանչ խաղարկութիւններէն»²¹:

Այստեղ նպատակահարմար ենք համարում մի փոքր մանրամասնորեն անդրադառնալ ներկայացման գլխավոր հերոսների դերակատարներ, շնորհալի սիրող դերասաններ Ա. Շիշմանյանին և Ն. Մամուրյանին:

Եվգինեի դերակատար Անահիտ Շիշմանյանը պոլսահայ հանրահայտ ուսուցիչ և դերասան Լևոն Շիշմանյանի հարսն է, այն Շիշմանյանի, ով հետագայում դարձել է եզիպտահայ բեմի սիրելին, ով Երվանդ Օտյանի և Միքայել Կյուրճյանի ներկայությամբ խաղացել է Չարշլը Արթին աղայի դերը և արժանացել առաջին մրցանակի²²:

Իսկ Միհրանի դերակատար, բազմաշնորհ մտավորական Նուպար Մամուրյանը, ով եղել է, իր իսկ արտահայտությամբ, «թատրոնի ախտէն վարակեալ մը տարիներէ ի վեր»²³, Կահիրեի օպերայի մենեջքիչ, գնահատված բարիտոն Հովսէփ Մամուրյանի որդին է: Նուպար Մամուրյանը ծնվել է 1941 թ. Ալեքսանդրիայում: Նախնական կրթությունն ստացել է Պողոսյան ազգային և անգլիական վարժարաններում, իսկ այնուհետև ուսումը շարունակել է Ալեքսանդրիայի պետական համալսարանում, որն ավարտել է 1964 թ. և ստացել քիմիկոսի և երկրաբանի որակավորում: 1964-1967 թթ. դասավանդել է Պողոսյան ազգային վարժարանում: Ն. Մամուրյանը դեռևս դպրոցական հասակից օժտված է եղել գրելու ձիրքով, աշխատակցել է «Արև» թերթին, ելույթներ ունեցել որպէս բանախոս: 1967 թ. հաստատվել է Մոնրեալում, աշխատակցել է Բոստոնի «Պայքար» թերթին՝ հանդես գալով ազգային-քաղաքական և գրական հոդվածներով: 1975 թ. Արշավիր Կյոնճյանի, Հարություն Արզումյանի և Վահէ Քեթլիի հետ հիմնել է Թեքեյան մշակութային միության «Ապագա» շաբաթաթերթը, որն ավելի ուշ հրատարակվել է երեք լեզուներով՝ հայերեն, անգլերեն և ֆրանսերեն: Ն. Մամուրյանը եղել է այդ թերթի առաջին խմբագիրը և մնացել այդ պաշտոնում մինչև 1979 թվականը:

Վերադառնալով «Եվգինե» ներկայացմանը, նշենք, որ մյուս դերակատարները նույնպէս արժանացել են հանդիսականների ջերմ ընդունելությանը և բարձր գնահատականին: Այսպէս, օրինակ, խոսելով Մարթա Տերտերյանի դերակատար, նախկին ուսուցչուհի Մոնյա Գա-

²¹ Նույն տեղում, էջ 4, 6:

²² Տե՛ս **Խորէն Տառեան**, Շիրվանգատի «Եւգինե» թատերախաղը Մոնթրէալի բեմին վրայ, «Քուլիս», Կ. Պոլիս, № 672, 15 դեկտեմբերի 1974, էջ 4-5:

²³ **Արսէն-Նուպար Մամուրեան**, Խորհրդածութիւններ «Եւգինե»-ի յաջող բեմադրութենէն ետք, «Քուրաստան», Ի տարի, թիւ 133, հունվար, 1975, էջ 6:

զանճյանի խաղի մասին, թատերախոսը հիացմունքով արձանագրել է. «Ահա լրջութեան մարմնացումը, պատուախնդրութեան ախոյեանը, մերթ քնքոյշ եւ մերթ անողոք, գրաւիչ եւ հուսկ ուրեմն վանողական: Ազնուափայլ տիկինը անցաւ բոլոր ճամբաներէն հարազատօրէն եւ կերպարանափոխութիւնները եղան բնական եւ համոզիչ»: Այնուհետև՝ Արշալույս Մենենտյանը (Զարուհի Գալամքարյան), «բնութենէն մշտաժպիտ այս տիկինը, յաջողեցաւ դառնալ հեզնաժպիտ, չարաժպիտ» և «կրցաւ պատկերացնել խառնակիչ, չարամիտ եւ բամբասող կնոջ տիպարը», Արա Գուլյանը (Բարսեղ Գալամքարյան) հաջողությամբ «ներկայացուց հարազատ պատկերը անուս բայց գործնական գիղաղցիին»²⁴ և այլն: Մնացած դերերը կատարել են Վահագն Արապյանը (Գաբրո Ազարյան), Շանթ Էորերը (Համազասպ Վարսամյան), Գրիգոր Գանարը (Աբգար Մուլթանյան), Անուշ Տողրամաճյանը (Հռիփսիմէ Միրվելյան), Հերմինէ Կուտսուզյանը (Երմոնէ):

Ականատեսների վկայությամբ, ներկայացումն արժանացել է հանդիսականների ջերմ ընդունելությանը. «Միբողներու այդ արուեստասէր փունջը, պատուով դուրս եկաւ այս բեմադրութենէն և անոնց լուրջ և զուսպ խաղարկութիւնը գնահատուեցաւ երկարատեւ ծափահարութիւններով»²⁵: Այդպիսի հաջողության հասնելու համար թատերախումբը մի քանի ամիս շարունակ կատարել է փորձեր շնորհաշատ արվեստագետ Սելմա Քերլիկյանի ղեկավարությամբ: Ի վերջո, տքնաջան աշխատանքը տվել է իր արդյունքը: Այդ աշխատանքի հայրենասիրական, ազգապահպան նշանակությունը, իրոք, դժվար է գնահատել: Ահա թե ինչ է վերապատմում «Եվգինե» ներկայացման նախապատրաստական աշխատանքների մասին ինքը՝ գլխավոր հերոսի դերակատար Արսեն Նուպար Մամուրյանը. «բոլոր դերակատարները ... դեռ կարող չէին երեւակայել թե ինչ չափով կատարելագործուած խաղարկութիւն կը սպասուէր իրենցմէ: Արագօրէն թաւալող օրերը եկան զգացնել իւրաքանչիւր դերակատարի իր ստանձնած դերին լրջութիւնը. բոլորին համար յստակ էր որ լաւագոյն արդիւնքի մը հասնելու համար անհրաժեշտ էր յարատեւ աշխատանք տանիլ. տակաւին մինչեւ վերջին շաբթուան օրերուն, հակառակ երկարատեւ ամիսներու կրկնակի փորձերուն, անոնք կատարելապէս վստահ չէին որ պիտի կարողանային որակաւոր ներկայացում մը հրամցնել հայ հասարակութեան:

Այսուհանդերձ, ներկայացման օրը վերջին արարի վերջաւորութեան, 600-ի մօտ հանդիսականներու երկարատեւ ծափերը ու ապաքուլիսներու ետին եւ յաջորդական օրերու ընթացքին եղած գնահատանքի անվերապահ խօսքերը, եկան մեզ փաստել թէ փորձերու եօթ-

²⁴ **Խորէն Տաւէան**, Շիրվանզատի «Եւգինե» թատերախաղը Մոնթրէալի բեմին վրայ, «Բուրաստան», Ժ տարի, թիւ 132, էջ 6:

²⁵ **Խորէն Տաւէան**, Շիրվանզատի «Եւգինե» թատերախաղը Մոնթրէալի բեմին վրայ, «Քուլիս», Կ. Պոլիս, № 672, էջ 5:

նամսեայ շրջանը տուած էր իր ամբողջական արդիւնքը: Անկասկած որ այս յաջողութիւնը ամբողջութեամբ կը պարտինք բեմի անխոնջ ու փորձառու փրօֆէսիօնէի մը, յանձին՝ Տէլմա Քեքլիքեանի որուն բարձրորակ ղեկավարութեան տակ շատ բան սորվեցանք»²⁶:

Այնուհետև Ա. Մամուրյանը, հաշվի առնելով այն հանգամանքը, որ մոնրեալահայերը, ինչպես ցույց տվեց «Եվգինեի» բեմադրությունը, ունեն կարող ուժեր՝ «որակաւոր ամաթեօր դերասաններ, որոնք բացարձակ եւ մշտական նուիրումով պատրաստ պիտի ըլլան ծառայելու հայ թատրոնին», բայց չունեն մշտական գործող թատերախումբ, առաջարկում է Ս. Գրիգոր Լուսաւորիչ Մայր տաճարի ծխական խորհրդին՝ «կազմել հայ մնայուն թատերախումբ մը գաղութիս լաւագոյն ոյժերով, որ պիտի գործէ եկեղեցոյ հովանաւորութեան տակ», և գալիս այն եզրահանգման, որ «այսպիսի գործի մը յաջողութիւնը հոգեկան մեծ զոհացում պիտի պատճառէ թատերախումբին մաս կազմող սիրողներուն եւ միեւնոյն ժամանակ առաւելագոյն չափով սատարած պիտի ըլլայ հայ մշակոյթին»²⁷:

«Եվգինե» թատերգությունից մի տեսարան՝ Սելմա Քեքլիկյանի բեմադրությամբ, ներկայացվել է նաև 1980 թ. մարտի 16-ին եկեղեցու «Մարի Մանուկյան» սրահում՝ «Մամիկոնյան» մշակութային միության 20-ամյա գործունեությանը նվիրված հանդեսի ժամանակ: Դերերը կատարել են Անահիտ Շիշմանյանը (Եվգինե) և Վահագն Արապյանը (Գաբրո Ագարյան)²⁸:

Եզրափակելով մեր խոսքը Մոնրեալի Հայաստանյայց առաքելական սուրբ եկեղեցու «Մամիկոնյան» մշակութային միության թատերախմբի Շիրվանզադեի «Եվգինե» թատերգության բեմադրության մասին, վստահությամբ կարող ենք արձանագրել, որ, չնայած բազում դժվարություններին, տարբեր երկրներից Մոնրեալում հանգրվանած և օտար միջավայրում գործող մեր հայրենակիցները, որոնցից յուրաքանչյուրն «իրեն հետ բերած է հայ բարքը, հայ մշակոյթը, հայ լեզուն եւ հայ ապրելու վճռական կամքը»²⁹, կարողացել են կատարել հսկայական ազգապահպան աշխատանք՝ ևս մեկ անգամ ապացուցելով, որ հայր ի վիճակի է դիմակայել ցանկացած դժվարության և հաղթահարել այն:

Բանալի բառեր – *դրամա, թատրոն, «Մամիկոնյան» թատերախումբ, Շիրվանզադե, «Եվգինե», Մոնրեալ, Սելմա Քեքլիկյան*

АНАИТ БЕКАРЯН – Драма Ширванзаде “Евгине” на сцене армянского театра в Монреале. – В ряде городов Канады в разное время возникали армянские любительские труппы. В 1962 г. при армянской церкви в Монреале был ос-

²⁶ Արսէն-Նուպար Մամուրեան, նշվ. աշխ., էջ 6:

²⁷ Նոյն տեղում, էջ 6-7:

²⁸ Տե՛ս Վ. Ք., Մամիկոնեան Մշակ. Յանձնախումբի 20-Ամեակի Հանդիսութիւնը, «Բուրաստան», տարի ԺԶ, թիւ 192-193, մարտ-ապրիլ, 1980, էջ 13:

²⁹ Վազգեն վարդապետ (հովիվ), Առաջին պատգամս, «Բուրաստան», Ե տարի, թիւ 42, յունուար-փետրուար, 1967, էջ 1:

нован театр “Мамиконян”. В ноябре 1974 г. здесь впервые в Канаде талантливый режиссёр Сельма Кекликян поставила драму Александра Ширванзаде “Евгине”. Артисты-любители продемонстрировали довольно высокий уровень актёрской игры. Спектакль имел большой успех и долгое время не сходил со сцены.

Ключевые слова: драма, труппа, театр “Мамиконян”, Ширванзаде, “Евгине”, Сельма Кекликян

АНАНИТ БЕКАРЯН – Drama “Yevgine” by Shirvanzadeh on the Armenian Stage in Montreal. – Armenian amateur theatre companies were first formed in the cities of Canada inhabited with Armenians. Back in 1962, a group of enthusiasts from the Armenian community in Montreal established “Mamikonyan” Theatre Company with an intention to preserve the Armenian culture on a foreign land. In 1974, “Yevgine”, a drama by Shirvanzadeh, was first staged in Canada under the direction of a prominent director Selma Keklikian. Due to the intensive rehearsals and the high level of professionalism of the amateur actors, the performance was a huge success.

Key words – drama, theatre, “Mamikonyan” Theatre Company, Shirvanzadeh, “Yevgine”, Montreal, Selma Keklikian